



浙江圖書館

10062



浙江圖書館

王梅溪尺牘

浙江圖書館

10062

上海經史叢書目錄



浙江圖書館



王梅溪尺牘目錄

謝王安撫啓

答諸賢王縣尉 萬章

答邵縣尉謝解啓

答陸解元謝解啓 洙

答高解元謝解

答諸葛解元謝解

答周主簿賀冬啓

答孫通判

除館職謝宰相啓

陳右相

王樞密

葉樞密

答梁狀元啓

答許狀元 克昌

答丁狀元 時發

答南劍州王守 恣

答温州詹通判 堯可

答樂清徐令 森

答曾知郡 汪

與梁司諫

王梅溪尺牘目錄



86年清点

390118

6字清点

答賀封贈啓

答樂清洪縣丞藏

與張侍郎闡

答新昌李縣丞結

答喻提舉樞

答樊提刑光遠

答温州莫守伯虛

答木狀元待問

答黃狀元洽

答邱狀元密

答莫守賀冬啓

答溫守袁正言孚

答饒州蔡通判

答彭教授龜年

答池州韓守元龍

答新靖州杜守明倫

答白待制

答沈運使樞

答陳總幹損

答賀樞密

答趙通判

答樂清權縣求司法

答荆南李太尉

答歸州周守

答周運使啓

答查運使啓

答吳參政啓

答施州甄守援

答周運使啓

答查運使啓

答潼川運使何舍人啓

答前四川茶馬續修撰齋

答沈待制調

答劉大諫啓

答凌尙書啓

與沈尙書啓

答姚子才

答章教授

答泉州交代周參政啓

與福州王參政啓

答趙知宗

答蔣教授

答興化陸教授

答任運使啓

答石察判 起宗

答郭縣尉啓

答興化何知軍啓

賀張尙書啓

賀陳右相啓

賀汪尙書 應辰

賀陳左相 康伯

賀虞相 尹文

與交代胡侍郎啓

昌齡弟送定葉氏啓

昌齡請期

聞詩定孫氏啓

回錢氏送定

代送定啓 七首

代回送定 四首

與趙安撫辭定奪

與王安撫

與橋道頓遞使董侍郎 萃

與直講史侍郎

與宰相乞外任

再與湯右相

辭建王

辭二觀察

與陳左相辭免余著作左郎

辭三觀察

與陳左相辭免除著作佐郎

與陳左相辭免除命乞外任

再與陳左相

與宰相論災異

與汪侍御

與汪侍郎

與二相乞祠

與張佐司

與虞丞相

答呂主簿

廷五首

與王安撫師心

與趙侍郎

令諛三首

與王舍人剛中二首

答陳少卿

二首

答李丞務

與張臺法

闡

答溫守周侍郎

綰

答台守凌侍郎

哲

與王運使之望四首

答曾知郡

汪二首

與任安撫古二首

答趙撫幹 伯椿

與任提舉 文薦二首

與王總領 之望三首

答王舍人 佐二首

與洪檢詳 邁

與杜殿院 起莘

與吳察院 芾

與汪侍郎

與凌侍郎 景

與劉察院 度

與陳侍郎 俊卿

與汪中丞

與趙安撫 靖卿

與梁司諫

答陳侍郎 正同

答溫守徐侍郎

與溫守莫郎中 伯虛

答湖守陳郎中 之茂

與永嘉南溪國朝宗

王梅溪尺牘

宋王十朋著

謝王安撫啓

伏准照牒舉某應四條旨揮者楓宸射策濫居多士之先蓮幕效官誤玷四條之選感深肺腑愧溢面顏竊以國家廣數路以取人神聖集衆賢而共理旣以進退黜陟之權畀之宰相吏部又以按察舉刺之職委之郡守監司逮元祐之垂簾起大儒而當國舉直錯枉紀綱旣正於朝廷激濁揚清除目載頒於郡縣去苛佞貪懦之四害取仁明廉直之數長議雖建於當時事始行於今日首膺茲選若難其人如某者素無技能偶竊科第贊畫雖久曹然民事之未知忤意何多嗟爾人言之可畏恩未酬於親擢期甫及於終更退而自顧則寸無所長進欲有爲則尺未嘗枉譽誰肯借况無韓子之三書薦不待求忽拜山公之一字靜惟僥冒抑有資

緣茲蓋伏遇某官一代宗儒三朝耆德入處天官之長出居方伯之尊循良夙邁於龔黃寬厚昭同於婁郝雅意本朝而忠可見嘉猷我后而人不知建文正之祠用清白以規下行溫公之議薦賢才而報君遂致繆庸亦膺甄錄某敢不益持士檢恪守官箴懷惓惓吠畝之忠勵蹇蹇王臣之節就有道而正己爲可用以待時朝拔一人而莫拔一人叨與取尤之列待以國士而報以國士敢忘知己之恩

答諸暨王縣尉

萬章

地處甌閩叨與宗盟之末職分州縣獲同王事之勞首辱朋緘仰欽厚德某官才高四傑望重三珠騰槐市之英聲擢桂枝之高選東州筮仕暫宣綵棒之威當宁急賢行應紫泥之詔某備員亡補竊食懷慙泛綠水而依蓮倦游儉幕具扁舟而把釣欣遇梅仙

答邵縣尉謝解啓

戰藝漕臺登名天府巍中有司之選仰欽所業之精縉紳聳觀縫掖歆慕某官羣
空冀北風繼召南試混諸生不作衛公之恥材優萬中果騰張鷟之聲富貴殆將
逼人科第何足恩子佇從仙吏徑到蓬山某叨與同僚獲觀盛事都騎顧我端繇
臭味之同長賤拜嘉輒講報投之好

答陸解元謝解啓

洙

得雋文場登名天府巍亞哀然之舉仰欽卓爾之才鄉評甚休言論無異解元雲
間馳譽筆下有神明疏通知遠之經工篆刻雕蟲之技處囊脫穎何止定平原之
從射策決科行將擢公孫之第某備數幕客獲觀萬書竊喜東州之有人預期南
口之得士

答高解元謝解

游翰墨之場俊同子美登賢能之籍名繼牧之有司甚明士論無異解元家聲韓

王梅溪尺牘

魯經學義文手劍登壇作平原定從之客筆鋒鏖戰繼澶淵却敵之風鼓勇春闈
唾手巍第

答諸葛解元謝解

游翰墨場雅負少陵之志登賢能籍兼聯小阮之名鄉評甚休士論無異解元譽
擅文虎風傳臥龍明溫柔敦厚之經工篆刻雕蟲之技處囊脫穎何止定平原之
從射策決科行將擢公孫之第

答周主簿賀冬啓

日遵南陸君子之道方亨律應黃鐘天地之心可見肇迎長景榮拜短牋某官學
不止於決科材已優於爲政鸞鳳棲枳棘暫淹州縣之勞鷗鷺在秋天行赴功名
之會顧一陽之初復茂百福以來綏某托芑同年竊祿仙里登觀臺而望方執筆
以書雲懷剡溪之人欲拏舟而乘雪

答孫通判

觀喬木而思世臣雅欽偉望泛紅蓮而游幕府叨與下僚第去官之匪遙恨事賢之太晚朋緘下拜謙德有光某官挺生相門妙有家學興公之才名冠世親得其傳叔敖之陰德在人固宜有後先正亡而象賢在權臣死而公道行宜相繼於鳳池寧久淹於驥足佇自別乘榮躋要途某竊第懷慙効官無補贊南陽洪農之畫有愧范岑賦鑑湖秦望之奇願陪元寶

除館職謝宰相啓

右某蒙恩授前件職者泛幕府芙渠之水吏責幸逃登道家蓬萊之山恩光誤及俯慙謏學濫與英躔竊以地號西崑象符東壁兩京事實石渠天祿東觀皆其名一代人才劉向揚雄班固爲之傑逮我有國尤清此途名兼三館之崇事異羣司之比書藏延閣富不減於開元人到瀛洲榮愈加於正觀有下筆如神之士無上

車不落之流器業於是乎成公卿多自茲出雖曰文行素著然而科目最高必俟大臣之薦論斯用故事而召試力可求而得者則禁其私請書不呈而命者蓋出於異恩魏國公奮自甲科猶薦而後召蘇內相擢絲制舉亦試而後除孰謂不才乃叨殊選伏念某性資愚鈍術業空疏避三舍於廣場屢焚筆硯終一星於太學始脫齏鹽瞻天顏咫尺之威借玉階方寸之地初乏茂明之對偶膺親擢之榮誦言豈逮於劉蕡試吏僅同於蕭傅固嘗效太史之探穴然未若中郎之得書期方幸於及瓜言旋桑梓坐靡容於暖席遽奉絲綸脫迹諸侯之賓觀光羣玉之府識曷堪於是正誚寧免於何如曾三威七穆之未知豈八索九丘之能讀堅其所守而已佩聖訓而不忘非爾其誰居之拜王言而增愧茲蓋伏遇國史僕射相公事業稷高文章訓謨寅亮天地弼予一人端能得宰相之體旁招俊乂列於庶位將以立太平之基好賢每過於緇衣下士罔遺於白屋况內以國本未定之爲念外

以敵情不測之是憂陽非衆則曷能勝陰文不修則何以濟武神聖以安危注意社稷之輕重繫公無競維人大亨以養一舉得垂天之翼兼收取敗鼓之皮謂昔嘗溷於文衡故今復歸於化冶某敢不芸披蠹簡燭照神藜讀黃香未見之書覬聞大道行宣公不負之學願事聖君過此以還未知所措

陳右相

志存社稷身任股肱宰相以鎮撫四夷莫予敢侮丈夫當掃除天下舍公其誰謂事君莫如以人故在上必引其類

王樞密

有仁者之勇以直道而行幾微不見於面顏精神折衝於樽俎忠義有激太山甘一擲之輕議論所加敵帚增千金之重

葉樞密

王梅溪尺牘

養以剛大動惟直方正色霜臺嘗落李祐之膽決勝籌幄必寢淮南之謀謂事君莫如以人故在上必引其類

答梁狀元啓

漢延多士策董相以天人閩產異才榜歐陽於龍虎雋聲籍甚輿論翕然伏惟狀元譽重泉南羣空冀北鄉薦屢居於前列士流咸伏其下風絲蘭省以巍登造楓庭而掖試論列歷代則深明治體條陳三弊則咸切時宜有司第其文實在三人之列天子異其對擢先萬國之英富貴行將逼人科第固已恩子願行所學以報吾君某叨與周廬獲觀大對偉晁孫之盛事屬瀨固之名家第狀首聽於傳臚詎敢妄論於衣鉢都騎顧我端絲臭味之同長牋拜嘉輒講報投之好

答許狀元克昌

欽雅望於月評簪纓世襲冠雄文於策士衣鉢家傳輿論翕然雋聲籍甚伏惟狀

元種學良苦摘詞最工試屢混於諸生不作衛公之恥文四舉於禮部始成韓子之名逮茲旅奏於廣廷果能展盡其底蘊問當今之務則固悉陳其大體論歷代之治則以爲無所容心故事有拘雖屈居於王後大名已著其誰能與許爭行所學以事君踐斯言而正己佇從仙吏徑到蓬山某備員殿廬欽閱廷對竊喜鴻臚之唱首傳太嶽之孫慶熙朝之得人辱都騎之顧我銘感謙德嘉臭味之相同珍藏盛文乏瓊瑤之是報

答丁狀元時發

廣廷待問竊喜朝陽之鳳鳴平地登仙咸羨遼東之鶴化輿論甚美斯文有光伏惟狀元挺秀海陵蜚聲天闕文掃科第之習言懷畎畝之忠以元氣之盛衰喻國體之治亂論一國一代一時之政有寢明寢昌寢微之風如使生漢文之時諸老其誰先賈誼假令居李唐之世有司必不第劉蕡因吾子之敢言見清朝之不諱

願攄素蘊以事聖君某叨與周廬欽閱大對喜皇朝之得士知天下之有人聽臚唱之傳增縉紳之氣都騎顧我譬草木臭味之同長牋拜嘉乏瓊玖報投之好

答南劍州王守咨

備員冊府誤叨佐課之榮託庇宗盟重拜朋緘之貺俯慙僥冒仰佩謙冲某太學
鰕生東嘉冷族折蟾宮之桂濫廁薦紳泛幕府之蓮獲事君子幸逃罪戾薦被寵
光燭照神藜與英躔之末選書紬金匱專史筆以何堪拜命若驚蒙恩有自某官
家傳政學天賦材猷半刺東州聊展騏驥之足一麾南郡行歸鴛鴦之行不棄故
僚曲加厚禮對尺書之面目如見德容望千里之門牆莫伸謝臆

答温州詹通判堯可

歡騰梓里共稱半刺之賢祿竊蓬山遽拜朋緘之貺俯懷愧懼仰佩謙冲某官秀
挺玉山望隆渤海訓早聞於詩禮業不墜於箕裘先正言居宣政之間凜聞風采

賢別乘貳濠温之郡蔚有聲名初登戲彩之堂首贊褰帷之治龐士元騏驥之足庸能久淹謝康樂山水之州固已改觀况聖君懷故國之喬木而太史有封事之甘棠必起象賢以慰輿論某東嘉冷族西觀小官喜父母之邦得神明之吏對尺書之面目如見德容望千里之門牆莫伸賀臆

答樂清徐令 森

牛刀再鼓鳧鳴遙臨喜子晉之江山得偃王之苗裔首拜朋緘之貺仰知謙德之光某官天賦吏材家傳政術倦游仕路飽諳閩浙之風薦綰銅章盡得温台之地况此樂成之小邑有同臨海之近州吏苟非賢人亦好訟允賴循良之治痛懲貪鄙之餘覩已爭先來何太暮某蒙恩補外需次還鄉幸父母之邦得神明之吏見書中之面目已得其人聽堂上之絃歌願觀其政

答曾知郡 汪

竊第太常雅資博約備員冊府端藉吹噓敬觀褒借之詞仰佩謙光之德某官心傳一貫名繼三曾學探天人庸止文章之富才宜臺閣詎容州縣之淹昔游宦於樂成最留心於鄉校經橫絳帳躬率諸生遂能於數載之間翕然變百年之俗弦歌滿邑化端自於言游龍虎成名功實歸於常袞遂令愚繆亦與作成某敢不益勵操修用酬知遇對尺書之面目如際高標詠雙柱之篇章敢忘盛德

與梁司諫

伏審光膺親擢榮陟諫垣方朝廷多事之秋承風俗積弊之後內有羣陰之壅蔽外有強敵之憑陵當言者不言而惡人之言已嘗斥立仗之馬今日乃何日而不鑒昔日其可忘覆轍之車茲幸正人進當言路固宜犯顏而首論大事毋用削藁而務爲不忠天子以爲是諫官以爲非言嘗聞於前輩君子有所恃小人有所畏人皆望於明公庶幾無愧古者之七人斯能上繼先朝之四諫某受知有素贊喜

尤深輒獻狂瞽之言以爲蹇諤之助

答賀封贈啓

色慘松楸思親不見恩霑泉壤拜命增悲媿謝臆之未據辱賀牋之先及其爲感
激罔罄敷宣

答樂清洪縣丞藏

詠南國之甘棠久思召伯對藍田之鉅竹喜見崔丞朋緘寵貽謙德加厚某官心
傳家學天賦吏材挺挺有祖風翩翩佳公子先尙書承流宣化遺愛猶存賢貳令
種學績文負丞何有贊一同之教化繼八座之箕裘靡待政成卽膺詔擢某鄉評
下士祠祿冗官喜父母之邦得神明之吏視印未久已驚鳧鷖之行掃門有期一
快鳳皇之覩

與張侍郎闡

王梅溪尺牘

伏審光膺宸命榮貳冬官侍帝幄以橫經極儒臣之高選恭惟某官抱器遠大稟資直方昔游冊府而讀異書首忤權臣而歸故里二十年不調節尤著於固窮五百歲相逢力蓋繇於稽古燕公乃東宮之舊留侯爲帝者之師願於論思獻納之時力贊剛明果斷之主登衆賢而開治表慰四海之想中興此多士所望於公非小子敢私其貺倚須大拜式慰輿情

答新昌李縣丞結

聞諸公交譽願登元禮之門見千里尺書已識泰和之面第朋緘之禮太厚致下拜之容有慙仰佩謙謙俯懷栗栗某官元精華胄河洛名家摘光豔於唐翰林文固有種探淵源於周柱下學豈無傳早工五色之詞宜繼八埒之譽戰則必克恥混試於諸生丞雖負予帥貳令於一邑雅負經綸之業豈淹州縣之勞佇自松廳徑躋蘭省某方竊祠廩誤膺郡章退惟僥冒之餘諒自吹噓之素登會稽而觀禹

穴雖歲月之不同夢春草而思謝池顧精神之已躍

答喻提舉 樗

備員槐市濫接英游載筆螭坳誤膺親擢與史館編摩之選叨經幃講讀之聯才素乏於寸長身曷堪於數職靜惟僥冒端自吹噓某官一代宗師四方儀表飾吏必以儒者之術宜其有聲育材而得天下之英可謂至樂傳衣鉢者不知幾輩登門闈者皆第一人觀其拔士而得尤知其樂人之爲善遂致狂妄亦蒙獎提見千里面目之書寵已華於袞繡記一人言動之實庇方託於旃幪

答樊提刑 光遠

誨諸生於館下濫與英游職內史於螭頭誤膺親擢旣與編摩之選仍叨講讀之聯才素乏於寸長身曷堪於數職恩踰望外媿溢顏間某官諸儒範模羣吏師表擅聲名於蘭省聳風采於柏臺帝嘉共理之良治務惟刑之恤飾吏以儒者之術

存心得君子之仁北斗太山學者咸仰殘膏賸馥後人悉沾師友之選極一時詩禮之傳有二子誦高文於方冊未窺夫子之牆論末契於年家端在丈人之列故茲僥冒實自吹噓

答温州莫守伯虛

某官天賦材猷家傳政學輟列星之高選蒞二浙之名邦況先大夫有遺愛於此州而賢刺史復共理於今日變千里歎愁之俗繼萬民安樂之謠凡居蔽芾之陰率被旃幪之賜故茲僥冒端自吹噓

答木狀元待問

竊以君子六千人定霸成期於一戰扶搖九萬里冲天遂冠於羣飛真國士之無雙誠後生之可畏大名籍甚輿論翕然狀元氣稟東嘉心潛西洛探潔靜精微之旨工雄深雅健之文蚤蜚泮水之聲巍拾計臺之薦奪魁蘭省賜第楓宸銜錦標

而歸事端同於盧肇成赤壁之捷年正類於周郎振賦海之名家符漲沙之勝地
極書生之榮而還故里盡人子之樂而奉雙親水綠蓮紅姑暫游於侯幕冰清玉
潤行同集於鳳池蔚爲邦國之光奚止鄉閭之慶某蓋鹽舊業桑梓陳人濫陪鸞
鵠之羣親覩鯤鵬之化世當漢武而異人輩出非遇時焉致此乎才非靈運而作
佛在先然其年不可及矣科第旣以恩子富貴行將逼人願不負於君親當相期
於遠大

答黃狀元洽

賢關校藝雅欽江夏之無雙蘭省掄材巍處眉山於第二雋聲籍甚輿論翕然狀
元名間綺園才優盧駱翱翔乎教化本原之地沉潛乎疏通知遠之經曰若稽古
何必三萬言讀武成篇惟取二三策見蕩蕩巍巍之爲堯舜知灑灑噩噩之曰商
周仰借玉階必陳三策之要俯拾地芥豈惟一經之明尙淹卓爾之才僅亞哀然

之舉况聞有異人而素先虎榜黃爲著姓而屢出龍頭綽有家風蔚爲盛事某鑿鹽舊業場屋陳人濫陪鸞鵠之羣親覩鷓鴣之化喜太學得人之盛快眞才擢第之高願不負於明君當相期於遠業

答邱狀元密

賢關戰藝筆屢掃於千軍蘭省掄材名遂參於三傑雋聲籍甚士論翕然狀元蘊秀江陰蜚英浙右蚤游天子之學獨抱聖人之經固嘗浚井而得泉奚止屬辭而比事明一王之旨兼取左氏公羊高穀梁赤之長觀三策之文庶幾晁錯董仲舒公孫弘之對巍折蟾宮之桂首探杏園之花衫鬢方青富貴已逼

答莫守賀冬啓

伏以氣肇黃宮天地之心始見日行北陸君子之道將亨某官治有先大夫之風民樂賢師帥之政茂對一陽之復歡騰千里之謠某待次衡門阻趨賓宇遽拜緘

封之賜倍增感愧之懷

答溫守袁正言孚

襍被殿廬蓋適我願兮之始懷章里閉正事其賢者之秋曾族賀之未遑遽朋緘
之先辱俯懷愧懼仰佩謙沖某官蘭省魁儒芹宮哲匠卓矣聖賢之學粹然道德
之容議論同乎古人文章蓋其餘事方權臣用事之日官冷廣文逮聖主當陽之
初席前賈誼擢自臺察處於諫垣言人之所甚難行吾之所素蘊首破和議力摧
奸謀有著龜先見之明凜松栢後凋之操君子以爲古遺直天下稱爲直諫官十
上固爭挺袁安忠正之節一麾出守得謝公山水之州上方念之公其歸矣某蒙
恩去國需次還鄉喜父母之邦得神明之政汲長孺雅嘗慕盜臭味本同王仲宣
茲幸依劉崱嶮可託

答饒州蔡通判

王梅溪尺牘

一麾出守迹濫廁於九賢同官爲僚治實資於半刺禮過於厚緘來以朋恭惟某
官世襲衣冠家傳詩禮學古然後入政修身乃能治人宜所至之有聲諒無入而
不得展龐統騏驎之足貳番君山水之邦靡待終更卽膺迅擢某誤被宸命濫持
郡符雅聞別乘之賢喜見天書之面通家自今日行登元禮之門異才非王孫誤
倒蔡邕之屣

答彭教授

龜年

一麾出守分符濫繼于九賢同官爲僚問政尤資於半刺禮過於厚緘來以朋某
官秀稟丹丘名高太學擢千佛之科第有二難之弟兄學探聖賢而志益勤文高
流輩而進未艾顧此番君之故國實維筮仕之舊游昔宣彩棒之威今長杏壇之
教諸公稱其博洽多士資其範模已遂終更佇膺召擢某濫被宸命誤懷郡章自
慚么麼之資輒拜寵褒之賜及瓜已久莫諧聯事之歡行李尙留庶有見賢之幸

答池州韓守 元龍

符分鄰壤未登元禮之門書拜朋緘如見荊州之面禮過于厚分何以堪某官生自相門妙有家學業襲簪紳之舊才傳經緯之餘小試銅章茂著循良之績榮持使節深知取予之宜咸嗟驥足之久淹姑畀雄藩而共理皂蓋東游而邦人共喜黃堂坐嘯而郡政自平因俾文公專美袁潮之政寧容子厚獨稱□泰之賢靡待終更佇膺召擢某才居下下志在休休有慚江左之家風誤辱楚東之名郡撫封不遠願修接境之歡甲子雖雌敢論同庚之契

答新靖州杜守 明倫

守番君之國顧庸繆以何堪遊鄭公之鄉依仁賢而甚幸禮過於厚緘來以朋恭惟某官名重楚東氣鍾杜固習家傳之詩禮富天賦之材猷自郡章之旣懷惟吏事之是究居邦必聞政稔觀九賢之風學道則愛人優爲千里之治預懷杜母之

德想見靖人之心次已久需來何太莫某科名濫竊符竹誤分自慚么麼之資仰荷吹噓之賜見尺書面目固已知賢登通德門闌行將承教

答白待制

某官繼事三朝榮聯次對典刑猶在有靖康賢相之風文采可觀本長慶詩豪之裔奉真祠於番水繼高躅於香山頤養遐齡鼎來多福况聖君思故國之喬木而先正有克家之象賢行以蒲輪召還荷橐

答沈運使樞

符竹濫分方託旃幃之庇鱗鴻遠屆遽頒面目之書盛德謙光朋緘過厚恭惟某官學傳既濟文繼東陽柏臺飛半豸之聲蘭省應列星之象七閩持憲了無囹圄之寃兩地効官潛贊廟堂之畫方聖主重外臺之寄以大賢居將漕之權洞曉利源錢已流于地上深憂時事情具見于目中宣室興思蒼生望起某天資不敏吏

事尤疎臺評類韓愈之譏譏治考同陽城之下下罪甚多矣部刺史想必能見容
行或使之賢大夫恐不得終事

答陳總幹損

稽山遊宦屢修同舍之歡番水得書如見故人面禮過于厚緘來以朋某官氣
稟劍津名蜚槐市然膏油而讀紙上語取科第如摘領底髭弟兄可謂德星世家
不忝忠肅昔宣威于吏隱今贊畫于總司績效有聞富貴將逼某誤膺宸命濫把
郡麾託末契于年家借餘光於幕府顧冀北羣空之馬致千里以奚難同江東日
暮之雲對一樽而未遂

答賀樞密

伏審光膺帝制榮陟元樞播告之初邇遐胥慶恭惟樞密參政白首一節赤心四
朝爵齒德俱爲可尊直剛大得其所養昔焉勇退無愧鑑湖之高今也來歸不異

蟠谿之起顧用舍行藏之際實安危治亂之機大臣以道事君春秋責備賢者不出則己必有可觀願如魏鄭公展盡底蘊咸望謝安石大慰蒼生茲輿議所期於公非十朋敢私其祝

答趙通判

一麾出守至仁仰戴于堯天同官爲僚可愛欣逢於趙日禮過于厚緘來以朋某官巍折桂枝榮聯玉葉振振周家之公子惓惓漢室之忠臣爲善最樂而得於家傳稽古入官而非以政學姑屈神明之胄暫淹州縣之勞番君得江湖心嘗令茲邑龐統展騏驎足來監此州行起宗英入扶王室某誤恩得郡無術治民閱三月而政未成思九賢而夢不見喜可知也幸王事之獲聯爭先覩之與邦人而共快

答樂清權縣求司法

平寬守法雅聞三語之賢愷悌攝官優布一同之政禮過於厚緘來以朋某官天

賦吏材家傳政學于公世有隱德釋之獄無冤民考已及于書三人咸思于借一
蕞爾樂成之小邑久哉令尹之乏人貪有至於賊民懦或聞于畏吏口南金而守
明府有類眞源律人法而禮人情茲逢卓茂口賴循良之治來綏凋瘵之民覩必
爭先聞猶失喜某遠游江左承乏楚東幸父母之邦得神明之吏故鄉雖遠未聞
言偃之絃歌歸興已濃及見河陽之桃李

答荆南李太尉

適夔子之邦方將問政識荊州之面何待封侯某官裔出隴西羣空冀北稟漢將
無雙之氣懷周臣不二之心邁方略於孫吳爲國家之英衛受知於上屢持大將
之權開府于荆益重長城之寄口不敢動時方賴公某之任遠邦假塗重鎮觀尺
書之面目喜其可知聞萬福之威名見已太晚

答歸州周守

王梅溪尺牘

聲迹相聞同處浙江之左封疆非遠並遊巴蜀之東緘來以朋禮過于厚某官詩
書弈世簪綬傳家挺秀氣於三衢馳英聲於列郡展騏驎足嘗佐苗人之邦分銅
虎符遙臨楚子之邑化已形于千里治未及于期年更不俟終召其非晚某備員
番水易任夔門將假道以觀風且登堂而問政面目之書已見喜得其人脣齒之
邦是依言歸于好

答周運使啓

行或使之難方歌於蜀道喜可知也夢已見於周公詞觀三峽之流書覩千里之
面禮過於厚緘來以朋某官姬籙傳芳坤維挺秀文非少而且重厚藝雖多而不
吝驕才學俱高子雲相如之徒也名德兼著君平仲元其人歟藹蜀郡之鄉評最
普慈之治績方聖主圖中興之業以大賢居將漕之權弭使節於一川揚仁風於
列郡以身化下小攬轡之范滂用義理財鄙流錢之劉晏矧輿議之素屬豈計臺

之久淹更不待終召其非晚某備員番水易任夔門將入境以觀風且登堂而問政叱王尊之馭險不憚於登天依韋臯之賢易端同於履地

答查運使啓

三峽倒流難敢辭於蜀道一麾出守芘端賴於蘇天荷友義之素敦媿朋緘之誤及禮過於厚情何以堪某官先朝名家今代人傑然膏油而讀紙上語取科第如摘頷底髭學兼通於古今才兩備於文武明目張膽陳治亂於天子之前論將談兵贊籌畫於元戎之幕輟握蘭之高選膺將漕之重權弭使節於一川揚仁風於列郡飛芻輓粟姑心計之暫勞簪筆荷囊諒超遷其非久某備員番水易任夔門首蒙千里之書喜見古人之面叱王尊之馭移孝子爲忠臣依韋臯之賢視青天如平地

答吳參政啓

王梅溪尺牘

一麾出守蕃宣濫處於上游同官爲僚謀議尤資於先達禮過於厚緘來以朋某
官場屋舊人江湖名士身薦歷於中外學兼通於古今登科五十年親見先朝之
盛搏風九萬里上至列星之躔凡後來持荷簪筆之流皆前日含香握蘭之選孰
謂諸侯之賓客乃屈四朝之老成更豈待終召其非晚某自番君之國易夔子之
邦久違數仞之門牆忽見天書之面目以幕府而待杜老豈同嚴劍南避正堂而
舍蓋公願效曹相國

答施州甄守 援

三峽倒流方嘆川塗之險一麾出守遽蒙賤翰之修德厚而謙恭過於禮某官中
山華胄西蜀良家才兼文武之全性稟忠義之實矯命制難陳湯有得於行權投
筆立功班超宜侯於定遠旣龍韜豹略之屢試姑皂蓋朱幡之暫乘控巴地之上
游守清江之名郡化已形於千里威且震於四夷更靡待終召其非晚

答周運使啓

老向巴人方起杜陵之嘆憂銷王粲幸依劉表之賢使已近於光華禮將勤於吐握某官道師孔孟才配卿雲金門玉堂謂踐揚之已久木牛流馬奚飛輓之尙淹詔將下於蜀天公其歸於魏闕某敬拜宸命行趨計臺媿謝牘之未修辱賀緘之先及同西州之士願承教於鄉先生與列郡之民咸託芘於部刺史

答查運使啓

渭北江東起日暮春天之嘆烏蠻鳥道同孤城絕塞之遊行或使之喜可知也某官雁塔前輩麟臺古人旣臭味之素同亦行藏之不異愛君憂國抗章如出於一心持節分符遊宦相從於萬里某敬拜宸命將趨計臺媿謝牘之未修辱賀緘之先及傾蓋如故久論程孔之交呼酒勸君行講韓張之好

答潼川運使何舍人啓

鄱水期年治亡善狀夔門萬里地竊巨藩揣庸繆以何堪恃高明而自慰某官學本自得才尤不羣道造子思之誠氣養孟軻之浩傑立角出於永嘉多士之地難進易退於權臣用事之秋翕然稱鄉先生卓爾爲天下士分符持憲不辭蜀道之難憂國愛民寧羨錦城之樂某叨預梓里稔聞月評仰齒德爵之俱尊喜風馬牛之相及叱西州之馭移孝子而爲忠臣依韋臯之賢視青天其如平地

答前四川茶馬續修撰

贛

國遊夔子稔聞舜友之風地過荊州未識韓侯之面自仰瞻於數仞遽下拜於雙緘某官虞庠舊人晉國奇士仕途歷三十年之久鵬程擗九萬里之高牧民如牧羊爲治素同於卜式問人不問馬存心無媿於宣尼坎則止而流則行仕不喜而已不愠求田問舍孰云不高結綬彈冠亦何足慕優游里巷頤養年齡然朝廷方思老成况天下咸仰齒德宣室未前賈誼蒲輪必起枚生某涉世最疎蒙恩誤寄

方觀風而入境思問政以升堂庭過伯魚竊效陳亢之喜書傳雙鯉益嘆玉川之賢

答沈待制調

屢上祠章誤得股肱之郡未修竿牘遽觀面目之書緘來以朋禮過於厚某官望隆茗雪世耀貂蟬八詠逸才真隱侯之華胄一門盛事實故相之難兄嘗分浙右之符尤著閩南之績奉真祠之已久奚從橐之尙淹行起老成以慰中外某闔分絕塞地易近藩將入境以觀風且登堂而問政歸自夔子國幸風波之已逃遊於鄭公鄉庶罪戾之可免

答劉大諫啓

屢上祠章誤得股肱之郡未修竿牘遂觀面目之書緘來以朋禮失之過某官學貫今古心潛聖賢樂道幾於屢空養氣本夫以直然青藜燭讀異書於蓬萊詠白

蘋詩起清風於苕雪當龍飛乾道之始正鳳鳴朝陽之秋官居諫垣色正朝路稱堯舜者向非孟子誰與王言指恭顯者豈無京房孰若公勇直道而去令名益高爭無媿於七人貴奚煩於五馬然臧倉存而魯侯不遇既承璫去則李絳必來益輸吠畝之忠往贊巖廊之治某叨與同舍素蒙異知迹雖隔於江湖心不忘於館閣

答凌尙書啓

兩朝重望一代儒宗擢第若摘領髭巍中甲科之選理身如梳旦髮了無纖垢之汙時可用而則行道無入而不得入則懋立朝之節出則騰治郡之聲退之以薦賢爲心天官惟口行儉有知人之鑑吏選尤精方聽履而上星辰遽銜盃而樂賢聖久淹家食想注宸衷佇繇八座之尊拱拜三公之貴某頃以晚進叨居下僚迹矣門牆之違巍然山斗之仰

與沈尙書啓

易郡而東誤得股肱之重去天非遠喜瞻喉舌之尊行遂登龍敢先致鯉某官書
讀萬卷名登兩科負賈生通達國體之才有韓子涵泳聖涯之學言無發而不中
最高北闕之書治所至而有聲尤振西州之譽上意每注於安危之際公色不變
於榮悴之交人才甚難今日有幾况當宁方興衰而撥亂豈重臣可置散以投閑
諒興宣室之思卽起東山之臥某爲學最淺受知實深賢關首與於陶鎔詞掖誤
蒙於薦引去門牆其已久仰山斗而不忘行由或使而身竄於夔喜亦可知而鄉
遊於鄭事大夫之賢者竊效古人之居邦就有道而正焉庶幾君子之好學

答姚子才

薦蒙肯顧寵示長牋豈惟嘆駢四儷六之精抑亦見聞一知十之學方觀韓子送
何堅歸道州之文端賴澹臺助言偃爲武城之治尙容再見以罄謝私

答章教授

日邊得郡寄千里之股肱魚腹有書見五年之面目禮過於厚分非可堪某官挺秀相門蜚聲帝學文法漢而尤古詩擬騷而更工衣冠盛唐室之蕭詩禮傳孔庭之鯉滿門科第繼元祐省闈之風異日功名嗣慶曆名臣之頌學無入而不得仕何來之太遲窮年吶吶膏油業已精於韓吏部諸公袞袞臺省官豈冷於鄭廣文名譽已崇富貴將逼某燈共庠序年同遠巡懷高山流水之音起日暮春天之嘆遠官夔子國幸已脫於風波來遊鄭公鄉庶可逃於罪戾

答泉州交代周參政啓

千里分符叨繼重臣之後雙緘拜賜輒爲盛德之先覩鳳有期續貂爲媿恭惟某官學術荀孟人才高夔昔遇上皇聳風采於臺諫晚事聖主贊謀於廟堂久屈逸於巨藩暫養高於琳宇如昔者大老之二兼天下達尊之三盍歸乎來爰立作

相某不學亡術見賢思齊將入境以觀風願登堂而問政竊比曹相一遵蕭何之規眞見周公不比宣尼之夢

與福州王參政啓

五載三州方幸投閑而置散一麾千里又叨宣化而承流顧大邦雖非小子所堪然便道有見先生之喜恭惟某官性天高卓材地閎深道扶孔孟而襲其傳文追揚馬而爲之配變儒風於兩學最治績於四川榮長諫垣所陳無非大事巍參政柄有告必以嘉猷方蹇蹇以立朝遂營營而去國四海咸冀其復起七閩豈得而獨私盍歸乎來如古者之二大老無出其右兼天下之三達尊願趣曹裝卽膺漢詔某門闌下士學校諸生蚤親模範之工遂玷簪紳之寵茲濫膺於劇郡幸密隸於崇階欲問爲邦竊自比於顏子願言承教終不叛於韓公

答趙知宗

五年三郡方幸投閑一劄十行又叨共理遠辱朋緘之及仰欽謙德之光伏惟某
官派出銀潢名高玉牒術業炎劉之歆向勳謀仙李之江河兼爵齒德之尊有風
雅頌之好帝眷尤甚宗盟有光況惓惓忠臣不忘畎畝之念俾振振君子咸陶麟
趾之風佇觀昌魯之季孫行作相周之衛武某昔在越絕獲知宗英屢陪觴詠之
遊久闊笑談之樂不謂晚塗遊宦重遇平生故人將使微之復繼蘭亭之盛不令
坡老獨稱安定之賢

答蔣教授

不學亡術繆懷刺史之章同官爲僚行詣廣文之舍禮過於厚緘來以朋某官姬
籙傳芳莆田挺秀深究羣經之旨早聯千佛之名登科蓋已十八年讀書何止五
千卷眷此清源之郡雅爲遊宦之鄉昔鳴子賤之琴今主馬融之帳化同魯國諸
生咸采於藻芹文振歐陽高第行登於龍虎官豈容冷詔將被温某立朝甚愚爲

政尤拙已五年而三郡又千里而一麾將入境以觀風且升堂而問道見尺書之面已得其人游半水之宮願咨以政

答興化陸教授

五年四郡誤懷假守之章千里尺書快覩同年之面禮過於厚緘來以朋某官秀挺三山風高二陸才蓋由於天賦學况得於家傳搏風宜上於天池采藻尙淹於侯泮眷茲莆水實爲冠帶之鄉宜得宣公以昌仁誼之學官豈容冷詔行被温某符竹濫分寶鄰是賴方驅車而假道願問政以登堂誦十年尊酒之詩辰乎何速見千佛明經之士喜也可知

答任運使啓

五年三郡方幸投閑一札十行又叨共理首辱朋緘之貺仰欽謙德之光某官秀挺三山名高千佛飾吏必以儒術修身本乎誠明色正霜臺風采稔聞於半豸位

分卿月禮樂咸資於一夔入則居清要之官出則爲光華之使著治績於數路藹歡聲於七閩姑爲轉餉之蕭恥作流錢之晏苟非仁義固未嘗陳於王前其在朝廷又孰敢齒於諸任使軺暫屈召節鼎來某涉世最疎辱知素厚千里誤分於竹二天仰賴於旃幪教化美而風俗淳小諸侯敢不自勉撫字勞而催科拙賢使者必能見容

答石察判 起宗

巍中亞魁榮歸故里大策聳傳於多士長牋寵及於陳人事甚盛而獲觀喜欲言而不足某官家傳萬石譽擅七閩志雅在於奪標射果聞於中目詳觀切直之對深得茂明之宜雖策勳有蕭一曹次之或殊然公議以王後廬前爲未愜清泉紫帽遽改觀於溫陵綠水紅蓮聊宦遊於越絕佇自賓幕卽登道山某幸茲分符叨與勸駕果遂郊迎之語薄攄簪盍之誠式過其歸榮親之樂孰加此不負所學許

國之忠其自今

答郭縣尉啓

榮擢巍第言旋故鄉薦蒙都騎之臨重拜雄文之貺老獲觀於盛事喜實倍於常情某官經傳獲麟文冠薦鸚蘭省復居於前列英聲益重於南州暫淹龍虎之美名姑作神仙之隱吏力蓋由於稽古人咸貴於爲儒託諸空言科第旣已恩子行其所學忠孝可以立身微聖賢其誰與歸於禮樂必從先進願自今日以觀遠猷

答興化何知軍啓

地異楚齊海不分於南北國猶魯衛政竊比於弟兄况爲天子守土之臣宜講諸侯睦鄰之好禮過於厚緘來以朋某官挺生相門妙有家學早蜚聲於槐市果巍第於楓宸惓惓懷憂國之誠耿耿抱疾邪之憤官清而要榮躋列宿之躔氣直以剛力請上方之劍乃反落御史之膽恨不斷佞臣之頭始知學校之有人孰謂書

生之不武上嘉蹇諤卒行其言天賞精忠遂魁其子風采聳於天下名節立於筆
端盍歸玉筍之班姑養琳宮之浩符分千里方歌來莫之廉詔下九重行作去思
之賦某聯名雁塔共事賢關既臭味之素同又封疆之不遠相爲唇齒之國義莫
重焉敬觀面目之書喜可知也

賀張尙書啓

伏審力辭從橐榮奉眞祠縉紳高勇決之風當宁惜老成之去不負所學於夫子
無媿陸宣公能全大節還故鄉有同趙清獻某受知最厚贊喜尤深方當危疑之
秋倍爲明哲之賀日探車騎卽登門牆

賀陳右相啓

廷渙大號相登眞儒謹呼萬方聳動列辟某官氣大以直學明而誠入則正色於
朝廷出則乃心於王室行藏合聖人之用舍進退爲天下之重輕不肯枉尺而直

尋惟務獻可而替否章屢上而求去甚力晷愈隆而挽留益堅可謂大臣已久慰蒼生之望爰立作相宜盡行平日之言績坐底於咸熙喜真成於不寐

賀汪尙書應辰

光膺帝制榮總天官讀侍金華班高玉筍恭惟慶慰某官書讀萬卷心醉六經養孟軻之直剛得仲尼之忠恕入則居獻納論思之地出則總方伯連帥之權德名重於華夷治行最於閩蜀學以傳道真宜爲萬乘之師才可佐王奚止居六官之長孰能熙帝之載當今舍公其誰茲輿議之所期非某敢私其祝

賀陳左相康伯

誕敷明命榮陟首台用賢非以序遷簡帝實由人望某官學傳聖絕心造道微德寬大而能有容氣直剛而不可奪入則以嘉猷而告后出則以斯道而覺民房年齡心不喜權斯能持於衆美蕭相國法若畫一固宜冠於羣臣況宰相以鎮撫四

夷而丈夫當掃除天下今日之事舍公其誰侵疆未歸人咸望於夫子不仁者遠
功實在於臯陶罔俾古人獨專其美

賀虞相尹文

廷渙大號朝登碩儒選衆得賢若舜湯命相之日縉紳相賀如文富宣麻之時謹
呼萬方聳動列辟某官勇自仁出忠由孝移鯁諤傳世南之風敬義稟坤爻之德
入則以嘉猷而告后出則以斯道而覺民拯社稷於艱危靜邊塵於談笑周瑜赤
璧之外不見雋功謝安淝水以還未聞相業公獨得於兼備事非止於一書樞府
出而全蜀安袞衣歸而敵國懼果膺爰立式慰爾瞻然大臣以道事君而春秋責
備賢者願以天下而自任勿謂吾君之不能魯國侵疆未歸責端在於夫子樂正
爲人好善喜竊同於孟軻罔俾古人獨專其美

與交代胡侍郎啓

執筆螭坳昔類蒹葭之倚分符閩嶠今同稊秕之颺不圖衰暮之孤蹤復有交承之雅契某官心傳絕學天賦剛腸當姦邪誤國之秋奮忠誼敢言之勇朱雲請上方劍欲斷佞臣之頭賈生陳痛哭書願繫單于之頸去國蓋一萬里投荒踰二十年會上聖之嗣興起孤忠於久廢心惟憂國屢推造膝之誠義不戴天力沮和戎之議卒落落而難合竟栖栖而不容周宣方撥亂以興衰韓子乃投閑而置散銜孟里巷晦迹桑榆盍歸乎來萬事之間在伯始無出其右千里之難制一賢赤心素結於睿知白首姑煩於臥治初需漳浦之次遽易溫陵之麾佇埃留中詎容補外某輩行相絕官僚偶同聽詩書執禮之言資直諒多聞之益左右共書於言動後先相繼以承宣誦十年尊酒之詩修尺素雙魚之敬來何太莫宜趣曹相國之裝政務惟新奚煩楚令尹之告

昌齡弟送定葉氏啓

家聲不振有同陳族之貧婚禮再修輒慕齊邦之大自非特達肯遂懇求荷臭味之相忘喜葭莩之有託某以季弟某年曾有室事俄至於斷弦伏承令妹德最宜家志方艱於擇鬻用憑媒灼妄議姻媿荷寵命之不渝諒夙緣之非淺適契三星之候敢怠良時薄修五兩之儀式將微意

昌齡請期

早沐恩私既遂求婚之懇再殫愚忱預聞授室之期月惟建丑之良日擇生明之次恭遣季弟躬造高閎願諧二姓之婚幸賜千金之諾

聞詩定孫氏啓

求婚於世姻之門夙緣非淺歸女於通家之子舊好愈敦幸無齊鄭之嫌竊比潘楊之睦約既前定言終不渝伏承令女乃吾家之甥想不嫌舅氏之薄某男某辱東牀之選固稔知姑女之賢况庚甲之相同亦門闈之甚偶兒時聚戲不殊同隊

之魚吉卜協從是謂和鳴之鳳有幣不腆別牋以聞

回錢氏送定

早同筆硯雅敦伐木之風晚結葭莩再講通家之好雖媿崔盧之大族庶幾王謝
之世姻伏承令嗣名著賢關何止通一經之學某女幼傳姆訓僅能誦七誠之篇
姑待年於父母之家願執帚於君子之室

代送定啓

萬張

通家有子偶同太學之齏鹽臭味爲媒濫折仙源之桃李念夤緣之不淺荷翦拂
之非凡旣蒙阮目之青寧媿齊邦之大伏承令姪女儒門孕秀女教傳芳想七誠
之素修諒五長之並有作配宜求於禁鬱于飛寧顧於華門而某男某身尙白丁
業惟黃卷賢異南容之不廢質同子皙之非夫妄求詠絮之才偶中牽絲之選幸

逢張貞之賞識寧患久貧庶幾畢萬之家風從茲必大

楊李

門闌素冷生華有類於枯楊臭味本同託庇幸逢於僊李良媿鄭齊之非偶豈同夷狄之論財輒恃夤緣敢通媒介伏承令女內閑姆訓外嫺婉容宜歸高節之伯鸞肯配非夫之子哲而某弟某年雖踰冠學僅知名未能去二惑之非何以稱五長之美仰固荷於不鄙退甚慚於匪宜既遂願懷之私敢伸言定之禮謹憑媒氏專叩高門

賈劉

託庇仁人之里爲幸已多通婚大姓之門受恩非淺喜踰望外媿溢顏間伏承令女年少甚都蓋女中之賈誼而某男某天姿不慧非昔日之劉郎况三復之未能豈五長之敢稱偶預東牀之選誤蒙青眼之知吉日載涓口協鳳凰之兆繁文盡

去薄修羔雁之儀

季孫

族降臺輿有媿魯孫之後家傳簪笏雅欽楚相之風曾牆仞之莫窺豈婚姻之敢
議偶因執斧遂獲牽絲某以弟某壯室偶睽勢難終於鰥處伏以令妹宜家素著
禮尤謹於孀居絲蘿幸逐於仰攀琴瑟式諧於再御門乏陳平之車轍誤辱重知
家無温嶠之鏡臺曷將厚意既奉千金之諾薄修五兩之儀

賈宋

俯念寒門欲婚姻之早畢仰攀富族豈財利之是論受恩非凡懷媿不少某男某
天姿不慧無洛陽年少之美才令女華胄甚遙有廷芬諸子之餘習茲因瓜葛之
舊願結葭葦之私諾既奉於千金幣敢陳於五兩

錢曹

王梅溪尺牘

二十四

女則以子娶之雅嘗有約大雖非吾偶也夫亦何嫌况弟兄之約殆三紀於茲而婚姻之謀非一夕之故端爲知己曷嘗論財伏承令女誦七誠之章素有大家之風味而某男某叨十才之裔媿無先世之名聲選濫預於牽絲禮輒伸於納幣如魚同隊念兩家生子之初爲鳳和鳴協五世其昌之盛

李季

桑梓相望仰于門之素大葭葦再結荷阮目之常青雖云臭味之同亦自夤緣之幸伏承令女婉容玉潔懿德蘭馨非求三復之南容莫稱五長之衛女某男某年丁幾冠才媿非夫方同孔鯉之趨庭遽效梁鴻之求偶質無甚秀濫爲范寧之甥表不素奇媿作甘公之壻非自通家之舊豈諧擇鬻之歡諾旣奉於千金媒敢通於一介鳳飛鸞合媿姜之雅好難忘雁往魚來劉范之世婚不絕

代回送定

周毛

陳平之美非久貧早觀奇相義方之娶爲知己益見高風仰欽蚌腹之生珠俯媿
葭姿之倚玉蒙恩有自揣分何堪伏承令嗣主簿巍奪錦標時競貪於擇巒而某
女子貧修布素人或恥於采葑一言不變於前盟輿論咸嘉其高誼辱雁贄之良
久報鯉書而太遲曲賴厚知不誅苛禮私問素冷偶逢鳴鳳之吉占老眼濫青遂
得乘龍之佳壻

陳鄭

鮑知慕忽敢懷請妻之私媿不如姜遂免辭婚之議茲通家之已久宜同氣之相
求伏承令嗣出自豪門素號千金之子而某女子生於敝族豈知七誠之書誤蒙
合姓之求恐負宜家之賦辱雁贄之來久媿鯉書之報遲不娶大邦公子有善自
爲謀之美願爲佳耦吾宗無何以能育之憂

黃徐

俯慙冷族雖非叔度之清流仰援高門誤辱偃王之華胄諒夤緣之有自荷聘問之多儀伏承令器早達義方習詩禮其有自而某女子未閑姆訓奉箕帚以何堪過蒙葑菲之求重辱蘋蘩之託况鳳占之協吉其何敢辭既雁幣之拜嘉永以爲好

陳謝

門第素微濫出有媯之後裔婚姻非耦誤攀康樂之名家揣分何堪拊心知幸伏承令姪義方素習固嘗聞禮以聞詩而某女子姆訓未閑第可爲締而爲綌荷菲葑之不棄獲箕帚之是親既辱華緘仍蒙重幣其爲感佩罔罄數陳

與趙安撫辭定奪

竊見近日下狀之人多於狀後乞送某處定奪者以兩爭未決務在依公非下狀

人可得指定竊慮其人與某處人吏預有計弊妄意指乞今後如出自台旨送下定奪者某當勉強理會不敢以不敏辭如下狀人妄有指定卽乞判送他所庶絕情弊

與王安撫

蒙台諭令撰二劄子不敢以鄙陋辭勉強承命乞賜斧削乃者殯宮頻年興修震驚陵寢幽明不安公私受弊蓋緣奉行者外以崇奉陵寢廟爲名內有僥倖恩賞之意遂將已成之宇徹而更造不損之器毀而更置不枯之木拔而再植其害非一端也去歲大修本府官吏頗有起貪功望賞之心妄生事端者某目擊其事而不敢言每思若一日獲迹清光當首論之雖死不避也尙書受主上之深知奉陛辭之玉音爲越人之師帥者無惜爲上言之干冒台嚴惶恐死罪

與橋道頓遞使董侍郎

奉

某竊聞往歲徽宗皇帝梓宮御舟所至凡津梁堰閘並不毀壞今來伏聞大行皇太后梓宮御舟比舊加大城門橋堰之類勢不免毀某親見奉使侍郎言日者奉請以梓宮行甲方爲利然毀民居多皇帝惻然曰茲豈求利耶特命行乙方皇上仁孝之德愛民之心如此臣庶感激至於流涕某妄意欲乞侍郎申奏朝廷今來祇備梓宮御舟其丈尺之數乞依往歲徽宗皇帝御舟之例庶免毀壞以承主上皇帝仁孝之德以遵大行皇太后慈儉之訓不勝幸甚某郡幕下僚妄議大事罪不容誅俯伏以待

與直講史侍郎

某輒有少稟皇子初建天下拭目以觀盛德郎中直講以正人端士居師友之職宜以經術正其心以古今治亂興亡之迹爲之勸戒養成器業以副一人付託之意如作詩一事乃書生氣習於道德亡補姑可置之舊日篇章尤不宜播之於外

恐爲人所議凡百要須慎重庶無悔吝某蒙建王顧遇不淺且辱郎中厚知輒獻區區幸恕狂妄冒瀆之罪

與宰相乞外任

某仰沐陶鎔備員中祕雖妻孥相隨竊食而二弟皆在鄉閭累重家貧難以提挈於某私計實爲不便欲乞在外差遣以敦手足之愛伏望鈞慈特賜敷奏

再與湯右相

某前日面投劄子以私計不便欲乞陶鑄在外差遣未蒙敷奏竊念某所乞實非得已今主聖臣賢朝廷清明多士彈冠咸謂時不可失況館職最爲清選某以不才竊食其間豈所願去實緣私計有所不便兼賤軀自八月間得肺疾至今痰嗽不除亦欲就外以便醫藥伏乞鈞慈早賜敷奏得一外任或岳祠差遣不敢有擇庶俾一門俱受保全之賜干冒鈞嚴某下情亡任激切戰懼之至

辭建王

某比蒙誤恩備員小學教授曳裾半載仰沐王慈顧遇有加感激無地第媿不才殊無毫髮之補今朝廷擇賢而代輿論咸稱得人三觀察天資俱粹美佩服義方學問日進茲復得賢模範顧未易量劇爲贊喜某比屢求去未獲今復濫遷聞命驚懼方力辭免無繇躬詣王屏稟違下情無任依戀之至

辭三觀察

某獲與遊從已逾半載自媿不才略無所補遽成違遠劇用瞻依教授劉國博老成醇厚蓋佳士也師友得人尤爲助喜某濫遷小著方此力辭面別無從敢冀仰體王慈力學自愛勉修忠孝上報君親某不勝區區之禱

與陳左相辭免除著作佐郎

某伏准省劄除某爲著作佐郎仰沐鈞陶感激亡地某比緣私計不便屢入劄子

某伏准省劄除某爲著作佐郎仰沐鈞陶感激亡地某比緣私計不便屢入劄子
乞外差遣未蒙敷奏今求去得遷聞命驚懼不能自己欲乞鈞慈曲賜矜恤特與
奏聞以寢新命庶使愚分稍安獲逃罪戾不勝萬幸

與陳左相辭免除命乞外任

某昨曾冒瀆鈞嚴辭免除命實緣求去未獲驟得美遷心不遑安非敢矯激雖小
官不當辭職在前輩亦有故事伏望鈞慈特賜敷奏仍乞檢照某十月內乞外任
劄子併賜施行

再與陳左相

某昨再瀆鈞嚴辭免除命伏蒙鈞旨以某官不當辭不與敷奏某有懷未盡須至
再陳竊謂小官雖不當辭在前輩亦有故事至和嘉祐間王荆公召除館職及命
修起居注皆力辭不受當時非獨在下者能辭在上者亦容其辭荆公雖立朝事
業不滿人意至辭受之際君子不以爲非世謂王荆公辭小不辭大司馬溫公辭

大不辭小荆公辭小固無可議不辭大則爲可罪温公不辭小者但謂小不必辭不謂小不當辭紹興初張侍郎子韶爲著作亦以求去得遷辭至五六遂得外任惟秦太師當國不容士大夫辭職及求去習以成風遂至今日有辭免者則以爲立異有求去者則以爲沽名但云官不當辭不問事之可辭殊不知古人進退辭受惟問義理如何前輩故事不問官職高下某今來所辭實緣求去未獲驟得美遷心不遑安非敢矯激伏惟僕射相公以道義事君以忠恕待下念某以私計不便而求去以求去得遷而力辭曲賜矜憐特與敷奏仍乞檢照某十月內節次乞外任劄子併賜施行

與宰相論災異

某謹按春秋隱公九年三月癸酉大雨震電庚辰大雨雪周之三月卽今之正月也穀梁曰八日之間再有天變陰陽錯行故謹而日之劉向日雷未可以出電未

可以見雷電既已見則雪不當復降皆失節也雷電陽也雨雪陰也雷出非其時者是陽不能閉陰氣縱逸而將爲害也今月十五日戊子大雨雪而雷聲繼作識者憂之春秋之時八日有變而聖人書之以爲異今一日之間雷雪併作其爲災異比春秋爲尤甚雷作而雪止是陽能勝陰也雷作而雪益甚是陽不勝陰之明驗也恭惟主上仰畏天變俯恤民隱放房錢以寬細民遣郎官以決滯獄固宜德之動天不俟終日然而積雪不消止而復作逮今且十日矣豈應天當以實而小惠不足以弭災耶某竊謂春秋所書必有事應先儒陽不能閉陰氣縱逸而將爲害之語不可不察夫陰爲夷狄爲小人爲宦官女子爲羣邪壅蔽上塞下聾之患天心仁愛吾君出災異以警戒之者其在乎此僕射相公居變調之任當任賢退不肖之責願以春秋災異之說爲上力言之進君子退小人內修闕政外備強鄰開闢言路以通下情閉陰縱陽以弭天變勿以天道爲遠聖人之言爲悠悠而不

之畏也某比因輪對狂妄日虞罪戾固宜鉗口結舌不言時事而猶敢及此者蓋區區憂國之心不能自己以無路而告吾君不可以不告吾相雖由此獲罪固所不辭干冒鈞嚴下情無任惶懼之至

與汪侍御

某竊聞金人千乘萬騎南牧中原遷都汴京窺伺淮甸中外洶洶咸以靖康覆轍爲憂况侍御長風憲任言責其憂國之心當如之何某采之輿論咸謂禦敵之策莫如用人而人才可爲今日用者莫如張和公劉太尉劉已易鎮京口亦可以當一面矣和公雖放令自便而猶未起廢伏聞侍御前日嘗於榻前論薦人才而屬意和公士夫傳聞莫不相慶第不知果能上回天聽否亦嘗指其姓名而力言之否如天聽猶未回侍御或未指其姓名當率諸公再對極力薦之如古人之進賢不進不已主上好謀能聽侍御言聽諫行第恐不言不患不受萬一不從則去就

當自此決不可微啓其端而遽然中輟也某竊謂今日急難之際人主正當棄瑕
用才人臣亦當棄平日之所惡而薦可用之才今之人才固有可用者矣然往往
不能無過朝廷以其常經臺諫論列而不敢用某區區之意欲侍御首以棄瑕用
才之說上告吾君且曰雖經臺諫論列而才可用者仰大臣侍從薦之不以過而
廢才侍御旣以身率之諸公必從而和之明天子必從而聽之如是則人才輩出
可以制千里之難金雖強且逼有不足憂者矣今日可言者無如侍御當言者無
如侍御某誤受侍御之知是以敢進芻蕘之說以爲開陳獻納之助伏望采而用
之以幸天下

與汪侍郎

某昨晚與馮員仲同詣台屏不獲瞻望第深景仰卽日伏惟台候萬福某迫切之
懇仰沐台念前已蒙廟堂相許朝夕俟命昨得薛季益報又稍遲似聞左揆之意

謂王嘉叟方去不欲又將某文字上嘉叟以上書而出某以私計丐祠事體不同
兼自去冬屢請至今未遂丞相愛惜士類意固甚善然君子愛人以德與其留之
以竊祿不如使其善去以保全之况某晚進不才在稠人中最爲碌碌進退去留
不足以爲多寡今諸公求去皆遂其欲何苦於某乃獨作難某於要路諸公無一
可告者惟侍郎丈矜憐有素故不免喋喋以告切望早賜一言以贊其決庶令寒
賤免致顛躓戴德之誠寧有窮已

與二相乞祠

某自去冬以私計不便及苦痰嗽之疾欲乞嶽祠以便醫藥節次八劄子及屢嘗
面稟雖已蒙鈞諾至今猶未獲命當聖賢相逢羣才並進之日某備員佐著事簡
職清豈不願留以苟寸祿實緣久苦賤疾有妨職事私心迫切不能自己欲乞鈞
慈速賜敷奏陶鑄嶽祠差遣一任感戴無窮某下情無任激切懇禱之至

與張佐司

比聞盜竊樞柄甚於陽虎取寶玉大弓公首摧其奸與先正忠獻公斬范瓊曲端等何異天下無賢愚遠邇莫不稱快知大賢之有後况我輩耶不有君子其能國乎真可爲社稷賀也某臥病半年日與死迫忽被誤恩已力辭免更望力賜一言俾遂所請甚幸甚幸

與虞丞相

某抱病臥家久廢朝謁懵然不知時事昨晚忽聞左司張杖差知袁州不覺驚駭朝廷除授固自有意非某所得知第以杖之學問操履舉皆過人在今朝列少見其比使之密侍經幄必能以直道啓迪聖君使之治劇剴煩亦能處紛擾而不亂况其直聲已著中外稱賢一旦外除有識無不短氣朝廷舉內修外攘之政正當愛惜人才相公以道事君尤宜留賢自助敢乞於榻前力賜主張令杖且留舊職

庶幾釋中外之疑伸善類之氣某素蒙相公知遇常願少効涓埃屬以疾病侵陵
亡從躬伸賤悃區區之心不能自己輒此稟布萬一伏乞鈞察

答呂主簿 廷

某頓首再拜氣肅晚秋候臨良月伏惟主簿學士百神交相萬福駢臻某仰竊
休重蒙記錄謹因回介少布謝悰不宣

又

某向寓雪溪獲瞻芝宇千里相逢而遂成傾蓋一樽屢共而辱與論文念几席之
久違荷故舊之不棄遠頒翰墨仰佩謙勤披味以還感媿兼集

又

某官斯文老匠後進名師不倦學古之心尤高鑄人之手聲望焯燁平生知識最
多人物魁梧他日富貴何患行見公朝之薦鶚寧憂小邑之栖鸞願調護於鼎茵

佇翱翔於臺閣

又

某比因竊第之還遂適披雲之願特蒙枉顧益見撝謙別離經時行將命稽呂之駕會合有日要須聯孟韓之詩惟是願言併遲面究

又

某濫被宸恩薦更幕府未修謝牘遽拜賀緘蒙長者之見先媿小人之不敏遂有親依之幸尤深忻忭之誠探禹穴而登稽山願觀古牒泛剡溪而訪安道不廢家風

與王安撫師心

會稽地廣民夥號東南大都會第以連歲災荒今年尤甚孟秋之初大風淫雨繼以江濤暴漲飄廬舍害禾稼瀕海之民死徙者多茲固仁人君子所宜動心仰惟

王梅溪尺牘

三十二

入境之初首加訪問下車之始撫字爲先上以寬聖君東顧之憂下以慰越人引領之望不勝幸甚某備員幕職日覩其事輒敢以聞

與趙侍郎令諷

拜違台範晦朔遽更仰德之誠不忘夢寐竊惟視印之初人事紛冗尺牘修敬不敢輒先雖去思之意不減於越人而後賀之罪已同於譚子尙冀貸其不敏

又

某官疏通練達寬厚老成歷四十年之仕途號二千石之治最憲閩師越異績愈彰方當宁以用度爲憂畀明公以貨泉之柄中外相賀以爲得人昔蕭何轉漕關中以給民食劉晏流錢地上用佐中興久無其人惟公是望輿論攸屬某非敢私比者天降之災害及稼穡越人瘠矣得旨賑濟遂獲更生竊知公爲上言之活人手段已見於得君之初也公已去而不忘越人德公亦將終身而不忘甘棠勿

伐之詠在越而不在燕矣

又

某以書生贊幕情無所知仰荷包荒不賜譴斥子犯有罪猶自知之婁公見容可謂盛德尙冀始終垂庇獲免於戾感戴何窮

與王舍人剛中

史館舍人道德才猷文章議論真一代人傑也爰從大對忤意權臣養浩十年卒不爲附麗計公道旣開平步館閣茲者正位西掖有識相慶昔晁董蜚聲於對策而不遇明主常楊得體於制誥而俱非正人夫豈如公兼備衆美至若子產以潤色有功而立鄭宣公以代言振職而興唐口業可嘉起於辭令天下縉紳所同望於門下非某區區私祝也

又

伏審代言西掖被命爲真自代之章輒及寒賤靜惟斯舉本非虛文前輩達賢引類多在於此爰從近歲茲道不公不出於觀望則生於請託故上不以實而求下亦以文而應自非高明特達之士以公道爲己任孰肯於觀望請託之外而舉人仰惟大賢獨近前輩自顧何人可當公舉獎借過情感媿亡地啓事一封聊申謝臆雖舉於公朝不當講私謝之禮然待以國士其可以衆人報耶

答陳少卿

某前歲竊第行朝遂獲出入門下者數月伏蒙顧遇情均父兄私心感激無以借喻况獲珠玉盈篋以歸輝映里閭寵於得第親故相見首以公之遇我者告之無不欽嘆厚德尙恨未有圖報之所而大旆已西瞻望門牆不勝依戀

又

李路鈴至越首拜誨緘之賜累幅勤厚如面台顏伏承養浩丘園日有文字詩酒

之樂仰見大君子所蘊過人朝著山林無入而不自得又蒙欲以所作見示尤荷
台眷之篤將始終教誨成就之也果蒙不鄙甚幸甚幸

答李丞務

蒙示先參政壙記三復流涕仍需挽章感謝不鄙恭惟參政宏才碩學精忠大節
凜然當代少見其比雖晚路爲權臣所抑不獲伸其素志然天下公論史官直筆
斷不可誣某輩鄙陋之詞豈足以發揚其萬一平生之所以聳慕者有不可辭三
章謾往惶愧亡地

與張臺法闕

臺法鄉丈茂對新揚檢勅臺憲神相忠嘉台候萬福某日者伏審光膺寵命喜至
於躍念欲卽修賀書竊謂大賢進用不止於此日竢殊擢故少遲之非敢自外於
門下也仰惟聖君求治甚切不爲無事吾鄉一二先達致身臺諫當得言之秋必

能明目張膽以慰公論某所以遲遲而賀者亦姑有待焉敢乞上體眷隆展盡底蘊以結主知指日大用以福蒼生以副簪紳之望維桑與梓亦被餘榮

答溫守周侍郎縮

代蒙賜以書翰圓緘累幅禮意有加旨酒生羊爲貺甚寵近代先達薦紳以名位自居貴不下賤久矣兼達尊之三且身爲邦伯而禮先於寒賤後學德盛而謙世所未有願某何者可以蒙此耶下拜之餘感懼并集

答台守凌侍郎哲

伏蒙台慈以某假塗赴闕特有寵賜某竊聞將有遠行行必以贖雖百鎰在所不辭然可以無取取則傷廉雖一錢有不宜受獨於仁者之賜輒起小人之貪拜貺以還感媿無地今祇領到州十千省發路之賜謹用回納

與王運使之望

某官道德政事文章經術當於古人前輩中求之非止可爲今日儒宗吏師也朝廷方以全蜀爲重故畀以外臺之寄恩威五十四郡屹然爲國長城以寬主上西顧之憂豈以蕭何能轉輸劉晏知取予之事而浼縉紳先生耶

又

越蜀相去萬里不修輿居間又復二年惟拳拳斗仰之誠不替朝夕去歲邸報中獲觀臺諫列薦之章士夫識與不識罔不欽嘆門下士喜如之何清資峻秩不足爲先生榮異日特書大書屢書者爲可貴爾比至行朝虞郎中出示蜀中小錄竊知職試文衡獲觀約束知其所得必真才實學相如揚雄二蘇輩一網盡矣省榜已揭太學得百餘人可謂盛事皆出先生疇昔作成教導之賜也近年文體屢變學官屢易士子多異論惟推服吾先生至今無異辭入蜀以來聲聞益著朝論翕然何大諫諸公稱道尤力召還必在數月間某或未以罪去復有摠衣之幸矣

又

某晚學不才試吏越幕自謂必以瘵曠獲罪誤蒙郡帥王書見知嘗薦僚屬四人於朝以某爲首然某亦佩服先生之教在越兩載不敢以一字達廟堂諸公臘月七日終更當日挈賤累還鄉欲屏迹山林以安愚拙不謂叨被誤恩有校讎冊府之命退惟僥冒實出先生平日齒牙餘賜第切媿感穀日離家二月初至行朝供職已半月賤累猶未來也汪聖錫爲少蓬尤厭士論館中皆一時英雋某廁迹其間葭倚羣玉媿不自勝先生顧遇素厚必有以警策不逮俾終爲善類之歸幸甚

又

某比因廷對尤荷今四川制置王文見知代言西掖舉以自代自惟疎繆聲迹沈下仰蒙特達感激不已以國士見遇者惟吾先生及舍人丈二人今皆在萬里故某歸依慕用之誠尤在於蜀也閻梁二同年試吏兩川帥幕閻質直梁俊邁皆蜀

中佳士獲趨事大賢必蒙厚遇劉韶美宮教在會稽遊從甚款自謂受知於先生語必慨然葉樞至越見之大以爲奇延譽諸公今亦移行朝供職矣先生行將大用薦賢報國尤所當先閭察推老矣當不待終更而薦之可也輿論所欲非某敢私

答曾知郡 注

某官人物不羣才德俱邵學術通倫類而無入不得儒雅節吏事而所至有聲南州之政已聞北闕之詔將下豈茲小壘可淹大賢輿論所期非某敢私祝也

又

往歲某官吏隱樂清主盟鄉校某獲執經與諸生之列最蒙不以碌碌餘子遇窺輿境而知所歸皆我公博約之賜也違去二十年兩遭家難屢困場屋聲迹沈下逾遠門牆尺書修敬莫克自致於千里之遠媿媿負負何以自文然景山仰斗之

誠初未嘗一日替仰惟高明宏博必恕其不敏而諒其無他臨紙悚懼不自己已

與任安撫 古

某官全名大節凜然超絕昔人前輩之上乃者持風憲肅朝綱忠言讜論屢批逆
鱗奸邪寢謀盜名器者爲之膽落議者謂雖漢汲黯唐魏鄭公國朝王元之唐子
方諸公殆無以過直道不容一磨出守有識之士咸爲清朝惜之然聖主圖治方
銳急於見賢端人正士決不可久外宣室之念正深詔書行落大江之西公其爲
蒼生起

又

某叨被誤恩校讎册府靜惟僥冒實出先達大賢吹噓獎拔之賜寧不知感第恨
來晚不獲瞻拜台光親承博約以慰平昔慕藺之誠然每見同舍郎稱頌盛德幾
不容口柏臺蓬山至今有光吾道甚幸名教甚幸

答趙撫幹伯椿

薦拜劄翰之辱如對標致於几席間喜可知也暑雨未歇伏審蓮幕風高贊畫有
相台候萬福某竊祿懷媿每厪記錄蝻蚱風味不惟勝無腸公子自可以輩瑤柱
江君會稽固不易得錢塘又絕無之臨食必起故鄉之思興與鱸尊同但不能如
張翰之勇決耳遠蒙分貺以養吾老饜媿感俱不少也道山石渠輒納墨本置之
悠然閣可與南山同入眼劉子政乃天祿閣中人豈容懷惓惓之忠久屈於外耶

與任提舉 文薦

某官以直道立朝去非其罪物論惜之茲承光奉宸恩榮持使節作外臺之耳目
聳風采於大江之西識者謂聖眷方隆茲實大用之權輿也伏想轡軒屈道而召
節已降天氣正炎淫雨未歇敢祝善保台重

又

某仰視台照輒有塵稟某有表叔賈如規者宣靖間在太學有聲後困場屋遂俯就恩科其人極有士行爲鄉里所推前任建昌尉以清白聞今任興國軍司理秋冬間赴上賈安分自守不求知於人然某官方以人物爲心不敢不以其名聞也又親戚劉鎮者戊辰榜中乙科其人有學問工詩文通曉吏事見任洪州司法登第一星餘尙困選調今皆獲趨事大賢深爲之喜儻蒙提挈成就甚幸甚幸苟非其人某亦不敢妄舉

與王總領之望

澗中去蜀如在天上不修興居狀又復一年惟是萬里口斗仰之誠不替朝夕幾叔至臨安出所賜書欽閱以還感佩謙抑去歲聞召命某喜尤不自勝謂卽有瞻拜之幸旣而改除輿論殊鬱蓋朝廷以蜀爲重姑留大賢然議者謂汲長孺當在朝不當使之在外也近日廟堂設施皆合人心如張右相胡邦行爲使凌汪二公

爲天官豫章宣城之除無不稱善縉紳日徯先生之歸便當爲治裝計

又

某竊食蓬山日虞罪戾茲蒙誤恩備員佐課退惟僥冒實先生疇昔獎借之賜第增感激然某去冬輪對妄論時事初自謂必得罪聖主寬容不惟不怒且略施行其言旣而館中諸公相繼論列上一一開納但側目者衆迹不自安某與馮圓仲一二同舍皆請外廟堂不肯敷奏葉樞以其事聞上諭宰執俱不容去某以求去得遷力辭不獲今亦不住爲乞外丐祠計萬一果遂所願甚幸甚幸先生知遇有素更乞時賜警策俾終不爲小人之歸以辱門下其爲幸也又大矣

又

幾叔被辟益見先生友愛之爲聞問間無不欽歎萬里之行良勞第恐坐席未暖必隨台旆而還也鄭正叔教授昔在上庠獲預執經之列久與幾叔游今相隨入

蜀切望周旋闔梁二同年近得書皆荷知遇闔又蒙以四條首薦尤感激也近館職甚缺員次第皆召試矣主上聖德日加陳丞相有容德頗收拾人才臺綱稍振陳應求副端排擊奸邪保全善類尤爲士論所歸乃汪端公薦引之也用劉信叔逐劉寶皆近日可喜事其他事體幾叔能言之

答王舍人佐

別大君子凡三年相去二千里之遠修敬不先下拜誨緘之寵者再矣舍人不以先達自居而謙德如此某晚進乃敢疎怠尙何以自文耶某比備數館職與二三同舍日以時事爲憂初欲同上封事未果會當輪對遂各以己見獻某最山野狂妄尤甚上寬大能受盡言不惟不怒且略施行之但左右前後矚目切齒者終不相置某自去冬求去劄子凡數十上凡閱八月始遂所請然區區之意止是丐祠廟堂乃委曲如此出自望外闕期近在九月間當復申前請以遂所志不復詣仁

者之里日俟舍人丈零陵報政遄歸廊廟公道復行清流增氣某已掛之冠當復彈矣

又

蒙示兩紙論列時事仰見舍人丈天資忠義過人遠甚不以身外而忘愛君憂國心也三復以還欽嘆不已某以五月十八日離行朝至途中聞次日有金使失禮事中外咸懷主辱臣死之恥况官高祿濃者當如何某方屏迹田野雖黜陟不知理亂不聞不復開口及時事然畎畝惓惓之誠猶前日耳况舍人丈受明主之知膺千里之寄宜其不能自己也來書所說荆襄雷化事此豈細故耶梁丈賢者方居言路不可不以此告之

與洪檢詳邁

比獲識檢詳難兄弟於朝讀雄偉之文聞正大之論知天下士在一門也又辱爲

王梅溪尺牘

三十九

檢詳同舍之末荷知良不淺臨行旣勤餞送仍寵以詩章歸橐有光感激無已違去數月斗仰不忘需次敝鄉偶成見闕雖貧居急祿而臥病未能遽行復申祠請實非獲已儻蒙台念見廟堂諸公曲賜一言俾遂所求不勝至幸

與杜殿院起莘

伏審光膺宸命榮陟臺端天子親擢正人中外莫不相慶竊聞殿院丈排擊姦邪保全善類饒君子不饒小人果踐平日之語某受知最厚贊喜叵量更冀盡摠素蘊益振臺綱以滿中外之望

與吳察院芾

伏審光膺宸命榮陟霜臺朝登正人中外胥慶拜違台範垂三十年雖修敬有稽而仰德不替比聞召還真成不寐之喜然君子未來而小人已去道出婺女日伺騎音竟不瞻際悵望何已某蒙恩補外需次還鄉方幸息肩官司來督赴任雖貧

居急祿而多病未能遽行遙望門牆倍增依慕

與汪侍郎

某入館之初侍郎丈以先達儒宗爲蓬萊主人遂獲朝夕趨隅以聽博約重辱顧
遇不後同輩臨行又蒙餞別之寵晚進不才得以此拜違數月斗仰益厯需次
敝鄉偶成見闕貧居急於得祿便欲奔走就職緣冒暑得疾未能去體素苦痰嗽
遇秋復作不免復申前請以劄子託圓仲矣敢望侍郎丈見廟堂一言俾遂區區
之願庶得在家醫治少延殘喘不勝感幸

與凌侍郎

景

某備數冊府獲識侍郎丈於朝望儼然之容聞正大之論知朝廷之有人三十年
盛名不虛得也謙恭下士真有前輩風某愚不入時獨蒙顧遇臨行又辱寵餞禮
意有加晚學不才得以此於大君子私心感激不自己已違去數月斗仰彌厯

需次還鄉偶成見闕雖貧居急於得祿而臥病未能遽行復申祠請實非獲己已
懇汪丈爲告廟堂更告侍郎丈曲賜一言俾遂所求幸甚

與劉察院度

伏審光膺宸命榮陟霜臺大用有階善類相慶某晚學不才濫游冊府獲親炙者
幾二年薰溫粹之容稔忠厚之論知君子所養過人媿僕輩匹夫之賤每蒙推誠
顧遇警策不敏臨行惜別著見顏色旣勤飲餞又寵以詩章誦小小林園意自憐
之句覺松菊之有光也違去數月夢寐不忘自聞新除喜不自己近朝廷去積年
巨惡大快輿論天下知臺諫之有人矣

與陳侍郎俊卿

光膺宸命榮陟從班朝登正人中外相慶天子欲其居獻納之地天下知其爲大
用之階有識君子惜其去風憲之早也某晚進不才素蒙知遇天資狂妄尤荷保

全去遠門牆不勝依慕

與汪中丞

伏以中丞負王佐才爲長御史以口公子之威名而持斧以裴中立之德望而視師風采所加華夏咸聳悍將爲之落膽狂口不敢貫弓一正天下如其仁不有君子其能國大夫出利國家安社稷茲其時哉宰相上佐天子理陰陽孰先公者某受知不淺贊喜爲多方苦癢痾之侵復伸祠佚之請望門牆其愈遠瞻履烏而莫遑想旌飾之已旋諒紀綱之益振倚須大拜續走賀緘

與趙安撫靖卿

某晚學不才備數冊府最蒙安撫待制丈顧遇不淺臨行又辱寵贈禮意有加然待制方以清白表率縉紳某不敢自處於傷廉之地雖不拜賜而感激未嘗自己拜違數月仰德益勤需次敝鄉偶成見闕雖貧居急於得祿然爲多病所困輒復

丐祠愈遠門牆不勝依慕

與梁司諫

某愚不入時獨蒙司諫丈特達知遇狂妄之迹賴以保全臨行又拜清白之貺拜違數月斗仰不忘竊聞司諫危言讜論排擊奸邪天下咸稱爲眞諫官莫不想望風采樂道人之善人之常情也况某受知不淺喜當如何

答陳侍郎 正同

某自卯角學讀書聞先生長者之論知欽慕忠肅公之爲人去春忽忽西邁一物不暇將獨攜温公忠肅一畫像而行尊堯集雖熟□□□□□□□□□□□□辱頒賜副以石刻旣整冠下拜遂撥置羣書朝夕欽誦眞可與日星爭輝非照乘珠比也

答温守徐侍郎

茲聞力請於朝已遂祠佚方與邦人同結去思未遑趨拜遽奉貶誨仰佩謙沖某嘗嘆近世人才少有全者或吏才長於治郡而名節無聞或名節著於立朝而政事多短獨侍郎丈昔持從橐天下稱爲正人出守海邦人咸謂自有郡以來未有賢明太守如侍郎者非某之私言也承台旆取道樂成當探伺戒塗俯伏道左與攀轅之列

與溫守莫郎中伯虛

某官天賦材猷家傳吏事籍甚之譽藹著簪紳聖天子方以外治爲憂故內自握蘭出分符竹踐揚中外無適不宜顧東嘉小郡豈足以屈大賢第以先大監遺愛著在千里人心甘棠且猶愛之况其子耶民望使君之來久矣想不勞而治也然朝廷需才方急指日召還行見臥轍攀轅又如三十載之前舊使君之去也

答湖守陳郎中之茂

拜違一年又半矣千里仰斗之情常在夢寐中也往五月去國行色匆遽不及以書告違還家許久去郡城稍遠無雪川便又不獲修敬媿媿負負何以自文不謂長者不以其愚不肖遠勞記憶賜以手書盈幅諄諄情辭備見如前日在道山侍几寫承博約時也喜如之何敝鄉去湖雖遠而知郡丈政聲籍籍著人耳目比得莫子齊書言吾丈去歲修城今又大忠烈廟皆有碑刻文章政事於是兩全某謂此乃通才餘事其好善嫉惡之性胸中耿耿之奇議論慷慨名節凜然當於古人中求之可也某雖晚進不才辱顧遇良不淺比見送馮圓仲序復及小人異日遂可託大賢之文牽聯不朽矣圓仲之去可惜然於出處無媿吾徒之幸元章半月之款想足以破願一好漢如此不容於時何耶杜起莘盡言而去士論甚休亦一時館閣游從盛事也某屏迹山間足迹不到州縣闔門二百指飯雖不足亦頗能忍窮有小小園林足以自適惟吠畝之心惓惓猶前日耳未能乘桴從游踐送別

之語臨紙不勝依依

與永嘉南溪國朝宗

某作別踰年不廢思仰自竊第歸鄉念欲一見異邑之阻願無由遂秋杪微寒伏
惟文候萬福近朝廷行兼經最優春秋吾友記問素熟於場屋尤利來春有補切
宜勉力某易任會稽且夕成行他日行李過越切望見訪少浼術士劉孚先談命
頗奇中覓字求見幸一過之更望吹噓俾有所獲亦不費之惠也會合未期望爲
遠業加愛

浙江

宿

四

歷代名人書札
續編
四册

六四
角

中華民國九年
三月初版



浙江圖書館

商 務 印 書 館 發 行

古 今 名 人 尺 牘

歷代名人書札	歷代名人小簡	范文正公書牘	司馬溫公書牘	歐文忠公尺牘	曾南豐尺牘	蘇東坡尺牘	王介甫尺牘	黃山谷書牘	陳龍川書牘	呂東萊書牘	陸象山尺牘	陸渭南書牘	文信國書牘	歸震川書牘	史忠正尺牘	錢牧齋尺牘	袁簡齋尺牘	曾文正公家書	曾文正公尺牘	俞曲園尺牘	姚姬傳尺牘	賴古堂尺牘	吳摯甫尺牘
續編四冊	續編二冊	二冊	二冊	四冊	一冊	四冊	二冊	二冊	二冊	二冊	四冊	二冊	三冊	二冊	一冊	三冊	四冊	八冊	四冊	二冊	二冊	十六冊	十二冊
正編二冊	正編四冊	二角五分	二角五分	七角	一角五分	六角	三角五分	三角五分	四角	三角五分	六角	三角	四角	四角	一角	一角	一角	五角	六角	四角	四角	三元二角	一元六角

丙(5-14)

中華民國七年三月初版

(王梅溪尺牘一冊)

(每冊定價大洋壹角陸分)
(外埠酌加運費匯費)

校訂者 商務印書館編譯所

發行者 商務印書館

印刷所 商務印書館

總發行所 商務印書館

分售處 商務印書館

上海棋盤街中市

北京天津保定奉天吉林長春龍江濟南

東昌太原開封洛陽西安南京杭州蘭谿

吳興安慶蕪湖南昌九江漢口武昌長沙



寶慶常德衡州成都重慶瀘縣達縣福州

廈門廣州潮州汕頭香港桂林梧州雲南
貴陽 石家莊 哈爾濱 新嘉坡

不准複製




浙江圖書館



浙江圖書館

10062



Centimetres

TIFFEN Color Control Patches

© The Tiffen Company, 2007

Blue

Cyan

Green

Yellow

Red

Magenta

White

3/Color